

Gui'ch ni guxhaal San Pabl loj ree bén Rom rliladx Jesucrist

Rxhiaal San Pabl xtiidx Dios

¹ Naj Pab, cayünan sirv loj Jesucrist, Dios gule naj din gacan xi apóstol Jesucrist, din gatiechan xtiidxza'caman.

² Diizd gocli mal rëb Dios diidxza'c guin ree, ni zëed loj xtiidxaman zi'c bacaa ree bén badëë xtiidx Dios loj ree bejn, ³ diidx guin ree ruza't, dux Dad ree Jesucrist guial zi'c bi'taman loj guidxliuj zi'c bénguidxliuj, loj xdiaa rey Davi zaman. ⁴ Per por xSprijt Dios laaman naj Xi'n Dios guial babanman loj ree bengüt, abi' guidiblagaa rajpaman guialrniabee. ⁵ Abi' par yaza't reeman, zeel ba-caabeeman naj din gacan apóstol din guidiblagaa guidxliuj chu' bén chililadx laaman, bén guzoob tëë xtiidxaman. ⁶ Abi' në lëjt ma nayab loj ree bén gule Dios din gaquidi xbejn Jesucrist.

⁷ Zeel caxhalan gui'ch guie lojdi bén rën ree Dios, bén zojb ree Rom, lëjt ma gulej Dios din gaquidi xbejnman. Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rën Pab cheman Rom

⁸ Yalojxgaj por Jesucrist rudën quixtëë loj Dios por gradi, guial guidibczi ruza't reeman lëjt xhien-aag rliladxidi Jesucrist. ⁹ Abi' zi'c cayünan sirv loj Dios, guidib guic guidib ladxan catiechan xtiidxza'c Xi'nman Jesucrist, abi' laaman ragbee guial ad rucwëëzt rbedx rniaaban laaman por

l jt. ¹⁰ Ad rucw ez t et rbedx rniaaban Dios din guneeman mod guidganan l jt, zi'c naj da xgaban diizd gocli. ¹¹ Din yu'czan gan guidganan l jt din g nan l jt yudar con xtiidx Dios din sudxi'chidi lojn. ¹² Din g n t edi naj yudar zian yaguieen du lasa' ree yudar loj guialrliladx ni raya'p ree, din chile' yalu' du luxdoo du lasa' ree.

¹³ Compniar raliduladx ree Jesucrist, r nan gagbeedi guial zien volti da't ma benan xgab guidganan l jt, din gacxhiey ree b en chililadx xtiidx Dios, zi'c ma gojc zien ree luar ni ma wan, per xt yan ad wayajct gan guidganan l jt. ¹⁴ Par naj naladxan da cwentan naj guial gul n chut ez benan xtiidx Dios, bal najman b en ciuda o najman b en guiedxdoo ya, bal rignia'man o ad rignia'taman. ¹⁵ Zeel r nnejzdoon guidganan l jt din gatiechan xtiidx Dios Rom.

Xguialrniabee xtiidxza'c Dios

¹⁶ Ad ratun 'tan xtiidxza'c Jesucrist. Din por diidxza'c guin ree z ed xguialrniabee Dios, din gra ree b en chililadx laan laa reeman loj dol, zi'c ree b en Israel zi'c ree b en ad najt b en Israel. ¹⁷ Din por xtiidxza'c Jesucrist ragbee ree bejn guial por guialrliladx reeman laaman ma naj reeman cwent sin dol: achet por stijb ni ren tijbzi por guialrliladx. Zian ca loj xtiidx Dios lod r b: "B en naban zi'c r n Dios, guidib tiamp ni nabanman rililadxaman laaman."

Dol ni rajp bejn

¹⁸ Dunuj ree rayagbee guial diizd xanyabaa z ed xcastiro' Dios par ree b en ad ridxga't laaman, b en ad r jnt ree zi'c rayal, abi' zi'c naban

reeman ruquie'ch reeman xtiidxli Dios. ¹⁹ Din ragbeechaaw reeman guial yu' Dios, abi' laagaj-caman balüü bejn ree guial yu'caman. ²⁰ Majsí ad ruguiaat bejn Dios, per diizd chi go'tchaaw guidxliuj raguiaa ree ni beenman, abi' por ni ma beenman rayagbee ree guial ad yu't dxej lox xguialrniabeeman abi' laa tēēman naj Dios. Zeel ad zajct xhie gudxiib bejn guiyc guial achet ragbeeman xcwent Dios. ²¹ Din majsí yu' ree bejn ragbee guial yu' Dios, per ad rajpt reeman laaman respejt zi'c rayal, ad rudēē tēēt reeman quixtēē lojman, aal xgab ren ree rüjn reeman ni ad rüjnt sirv abi' gaz ragdxa reeman. ²² Rēb reeman guial rajc da't reeman abi' mazri na tont reeman. ²³ Din luar guiēn reeman Dios ni ad yu't dxej guiēt, rēn reeman ni nit ree yu' dxej, rēn reeman ni naj ree zi'c bejn, ni naj ree zi'c biguijn, zi'c ree be yu' tajp guia' nē ree bēēl.

²⁴ Zeel ma gulēēladx Dios laa reeman loj xixgab mal reeman, abi' rüjn reeman ni natu ree con ree ben ren. ²⁵ Luar chinal reeman xdiidxli Dios, zinal reeman ni rusquiee ree. Abi' rēn reeman rajp tēē reeman respejt ni been Dios, luar guiēn reeman laaman guial beenman laa reen, abi' laaman rayal gap ree bejn respejt zianczi. Amén.

²⁶ Zeel gulēēladx Dios laa reeman loj ree ni dxuudx rüjn reeman. Abi' zien ree bēngunaa ad nabantri ree xnejz, rēn lasa' bēngunaa gajc reeman. ²⁷ Ziangajc zien ree xinguaaaw ad nabantri xnejz, rēn gajc lasa' xinguaaaw reex, xinguaaaw con xinguaaaw rüjn reex ni dxuudx, ni natu. Abi' laagajc reex rguuil xcasti reex.

²⁸ Abi' guial ad ridxga't reeman Dios, zeel gulëëladx Dios laa reeman loj xixgab mal reeman, din güün reeman ganax ni ad rayalt güün reeman. ²⁹ Ganax ni ad rayalt güün reeman rüjn reeman, za'në reeman xinguaaw ren o béngunaa ren, zien ree ni mal rüjn reeman, rzëëbladx reeman gap reeman ni rajp ree ben ren. Dád nadëdloj reeman, rugüjt reeman bejn, rguuil reeman wadijl, rusquiee reeman bejn, ganaxczi ni mal yu'guijc reeman abi' rbëë reeman xtiidxguijdx bejn. ³⁰ Rnieeguijdx tëë reeman bejn, ralen reeman Dios, ad rajpt reeman bejn respejt, rlies xvalor gajc reeman, rüjn reeman benro'. Abi' rbëëguijc reeman ni mal ree, ad ruzoob tëët xtiidx xdad xniaa reeman. ³¹ Dád nad reeman, ad rüjnt cumplid xtiidx reeman, ad rënt lasa' reeman, ad raya tëët lasa' reeman. ³² Ragbeechaaw reeman rëb Dios guial chi guiët ree bejn, dxel gra ree bén rüjn gra ree ni guin yayal casti. Per majsi zian, rusnuu gajc rüjn reeman ni mal guin ree abi' xt rabaa reeman chi rüjn ree ben ren zian.

2

Xguialguxtis Dios

¹ Zeel chutëëz lüj guial rëbil xhie casti rayal bejn, ad rajptil derejch guiëbil zian, din lüj gajc rayal casti guin guial cayüjnl zi'cgajc rüjn reeman. ² Per dunuj ree rayagbee guial Dios rüjn guialguxtis zi'c rayal, chi rudëëdaman casti bén rüjn ree ni mal guin. ³ Abi' lüj guial rëbil xhie casti rayal bejn abi' nëgajquiza lüj rüjn zi'c rüjn reeman, ad naladxil laal loj xcasti Dios. ⁴ Ad rëntil guialnaza'c Dios con

lùj, ad rëntil guial rdaanman lùj rajp tëëman lùj pacens, ni'quid ragbeetil guial pacens guin rùjn lùj yudar dìn gapil tiamp par yayüjnl xgab por xtolil. ⁵ Per guial dád nadil, ad rëntil yajejquil loj Dios, zeel lùj gajc cayüjnxhiey xtolil par dxej ni gudëed Dios casti, dxej ni güünman guialguxtis zi'c rayal. ⁶ Par gudëëman ni rayal tijbgaj bejn bal gonin beenman. ⁷ Gudëëdaman guialnaban tiblayaa loj ree bèn ad radxagt rùjn naguiejn guiban zagdxe guial rùjn reeman naguiejn yayal reeman guialnaza'c yu' xanyabaa, rùjn tëë reeman naguiejn yaya'n reeman zagdxe loj Dios dìn gap reeman cuerp ni ad yu't dxej nit. ⁸ Per ree bèn ad ruzoobt diidx, rdxe'ch Dios laa reeman abi' gudëëdaman laa reeman casti, dìn luar chinal reeman xtiidxliman, zinal reeman nejz mal. ⁹ Gra ree bèn zinal nejz mal, naya sac reeman sagdiaj reeman, yaloj ree bèn Israel dxel bèn ad najt ree bèn Israel. ¹⁰ Guiáad ree bèn zë loj nejz zagdxe, guilies Dios xvalor reeman, yabaanëman laa reeman, yabe'cdxe tëëman luxdoo reeman, yaloj xgaj ree bèn Israel dxelri bèn ad najt ree bèn Israel.

¹¹ Dìn Dios tiblojzi rùjnman guialguxtis con gra bejn. ¹² Gra ree bèn cayüjn dol sin guial ad nünbeet reeman ley badëed Dios loj Moisejs, tëd reeman casti sin ley guin. Guiáad ree bèn cayüjn dol majsi ragbee reeman ley guin, laa reeman tëd casti zi'c rniabee ley guin. ¹³ Dìn ad guial guientzi bejn ley guin ma nayaman loj Dios, bèn rùjn ree zi'c rniabee ley guin laa reeman naj bèn naya loj Dios. ¹⁴ Per chi ad najt bejn bèn Israel, abi' cayüjnman ni zagdxe sin guial güünbeeman ley

guin, dxel ma cayünman zi'c rniabee ley guin ma-
 jsi ad nünbeetaman laan, guialzi nünbeeman conin
 naj ni zagdxé con tää nin naj ni mal, abi' guijc
 gajc reeman zëéd xley reeman. ¹⁵ Din zi'c naban
 reeman, rguien guial guijc reeman zëéd conin
 rayal güün reeman con tää nin ad rayalt güün
 reeman luar gap reeman ley guin. Abi' laagajc
 reeman ragbee chi ma been reeman ni zagdxé
 o chi ma been reeman ni mal. ¹⁶ Zian gac chi
 güün Dios guialguxtis por gra ree ni naguie'ch ni
 rüjn bénguidxliuj. Abi' zi'c culün bejn ree guidibczi,
 laaman güün guialguxtis por Jesucrist.

Bén Israel ree në xley Moisejs

¹⁷ Yan, lüj guial najl bén Israel yu'guijquil guial
 rajquil ley badëé Dios loj Moisejs, abi' rüjnl nabë
 guial najl xbejn Dios, ¹⁸ rëbil guial ragbeel xhien-
 aag rën Dios guibanl, abi' por xleyaman ragbeel
 conin naj zagdxé güünl. ¹⁹ Abi' naladxil zile'
 guzuxnejzil bén ad nünbeet ree ley guin në ree
 bén ad nünbeet xnejz Dios, ²⁰ naladxil zile' gulüül
 bén ad rajct ree në ree bén rajc ta'nzi, guial por
 ley guin ragbeel gra, ragbee tää conin naj diidxli.
²¹ Per zi'c nabanl, ¿chexc zeel ad rulüüt lüj gajc luar
 gulüül ben ren? Din lüj rëb guial ad laat cwan
 bejn, abi', ¿chexquiza zeel rbanl? ²² Rëbil guial ad
 laat sunë bejn bén ad najt lacheelaman, abi' lüj,
 ¿chexquiza zeel rüjnl zian? Rëb tää guial rdxe'chil
 ni naladx bejn naj dios, abi', ¿chexquiza zeel rbanl
 lën yadoo lod yu' ree Dios guin? ²³ Dád nabë
 rüjnl guial nünbeel ley, per rusa'nxtul Dios guial ad
 rüjntil ni rniabee ley guin. ²⁴ Ze'cli rëb loj xtiidx

Dios: “B n ad najt ree b n Israel rniece reeman Dios diidxguijdx por l jt.”

²⁵ Diidxli r jnqui sirv guial ru xcuerp bejn sen ni ru ree b n Israel, bal r jnman zi'c rniabee xley Dios. Per bal id r jnman zi'c rniabee ley guin, achet sirvan guial yu'man sen guin. ²⁶ Per bal tijb b n ad yu't sen guin nabanman zi'cgajc tijb b n rajc xley Dios majsi ad n nbeetaman laan, dxel ma nayabaman zi'c tijb b n yu' sen, majsi ad yu'taman sen guin. ²⁷ B n r jn zi'c naj xley Dios, majsi ad n nbeetaman ley ad yu' t etaman sen, gusa'nxtu'man l j guial n nbeel ley guin yu' t el sen guin, abi' ad r jntil zi'c rniabee ley guin. ²⁸ Din ad guial rajlt bejn loj nacion Israel, ad guial yu' t etaman sen ni ru ree b n Israel ma najman b n Israel loj Dios, ²⁹ b n wali naj b n Israel loj Dios, guidib luxdooman zinalaman xnejz Dios, ad por guial yu'taman sen ru ree b n Israel, ad por xcostumbr t et reeman, por guial naban reeman con xSprijt Dios. Abi' b n naban zian, Dios rlies xvaloraman sa'n ad b nguidxliujt.

3

¹ Zeel zanadi lon xhieczi gan naj bejn b n Israel o xhieczi gan chu'man sen ru ree b n Israel. ² Per naj gani lojdi guial gadxagayaa mod lasajc guial naj bejn b n Israel, din yalojxgaj loj ree b n Israel bad ed Dios xtiidxaman. ³ Yan ad naladxidi por guial yu' ree b n ad zinalt xnejz Dios, ad z jntraman cumplid ni r baman din xo g un Dios ni r baman g unman con ree b n zinal xnejzaman. ⁴ Din laaman ad yu't dxej guchaa xtiidxaman, majsi gra b nguidxliuj naj b n rusquiee, per Dios

ad nētaman rusquiee, zi'c rēb tiblajt loj xtiidxaman lod rēb:

Gra bejn güünbee lüj guial rüjn cumplid xtiidxil, abi' achet zajc gudxiib reeman guijquil.

⁵ (Per yu' bejn rüjn xgab) guial bal por dol ni cayguieen ree rulüü guial benza'c naj Dios, ¿chexquiza zeel najman benmal rudēēdaman bejn casti? ⁶ Per naj rni lojdi guial ad najt Dios benmal, din bal najman benmal xoza güün xguialguxti-saman con bénguidxliuj.

⁷ Din bal yaguie'ch ree guial ad rucaagdiajgt xtiidx Dios, laan naj ni rüjn yudar xtiidxli Dios din gap bejn laaman mazri respejt, dxel ad zajc-tri guiēb Dios naj bejn bēndol. ⁸ Abi' mazri ma yaguieen ree ni mal din gui't ni zagdxē, zi'c rēb ree bejn culün bejn ree, per Dios gudēēd casti bēn rēb ree zian.

Graczi bejn ma been dol

⁹ Zeel zi'c ma rnin por ree bén Israel, nē por ree bén ad najt bén Israel, abi' ma ragbeedi guial ad zajct guiēbidi guial mazri benza'c naj ree bén Israel guial loj ree bén ad najt bén Israel, din tiblojzi nayajc ree bēndol. ¹⁰ Zi'c ca tiblajt loj xtiidx Dios lod rēb:

Achutczi naj benza'c,
per ni'qui tijb bejn.

¹¹ Achutczi rignia'.

Achutczi raguiil Dios.

¹² Gra reeman ma basa'n xnejz Dios.

Gra reeman ma zinal nejz mal.

Achutczi cayüjn ni zagdxē,
per ni'czi tijb bejn.

¹³ Zi'cgajczi tijb baa ni zojbyal,

zian ganax ni dxuudx ririi ro' reeman.

Ganax diidx rusquiee rniece reeman.

Abi' xtiidx reeman naj zi'c xvenen bëël.

¹⁴ Ganax diidx mal ririi ro' reeman,
diidxguijdx ni rüjnnaa lasa' reeman.

¹⁵ Za'sin reeman din gugüjt reeman bejn.

¹⁶ Bantëez guin zë reeman, rüjn reeman ni dxuudx ree.

Abi' rusagzi reeman bejn ree.

¹⁷ Ad nünbee tëët reeman xhienaag naj guialrbajn bejn zagdxë.

¹⁸ Ad yu'guijct reeman guial rayal guidxeb reeman Dios.

¹⁹ Dunuj ree rayagbee guial gra ni zëed loj xley Dios, naj par ree bén zinal ley guin, chitëë chu guiëb guial achut ragbee xhienin naj dol, laan naj par gagbee bejn guial najman bëndol loj Dios.

²⁰ Din ad guial güünt bejn gra ni rniabee ley guin ma nayaman loj Dios, ley guin rulüü din gagbee bejn guial najman bëndol.

Por guialrliladx ma naya bejn loj Dios

²¹ Per yan Dios ma balüü dunuj ree tijb nejz guial xhienaag yayajc ree naya lojman. Ad guial yaguieentzi ree zi'c rniabee ley guin, por ley guin në por ni bacaa ree bén badëë xtiidx Dios loj ree bejn. ²² Rayagbee ree guial rüjn Dios bejn cwent zi'c bén ad yu't xtol por guialrliladxaman Jesucrist, din par Dios tiblojzi naj bejn. ²³ Din gra bejn ma been dol, achutczi naya niz loj Dios. ²⁴ Per guial najman benza'c, ma beenman perdon dux tol ree sin guial yadijx ree, ma nayajc ree perdon por Jesucrist, bén gudix por dux tol ree chi gütaman

loj crüzj. ²⁵ Dios guxhaal Jesucrist, din por xre-nman chu' perdon par bénguidxliuj. Abi' perdon guin naj par ree bén rliladx Jesucrist. Zian rguien guial graczi rüjn Dios xnejz, abi' bal guia'xchej ad beent xguialguxtisaman por dol ni been ree bejn, laan naj por pacens ni rajpaman con bejn, ²⁶ guial ma ragbeeman goc güün xguialguxtisaman. Zian rusnuu rulüüman guial graczi rüjnman xnejz, zeel rüjnman perdon xtol ree bén rliladx Jesucrist.

²⁷ Yan, ¿xhienaag yaguieen ree nabë? Achet yaguieennë' ree nabë, din ad guial yaguieent ree ley guin cumplid ma nayajc ree perdon, yayajc ree perdon por guial yaliduladx ree Jesucrist. ²⁸ Zeel rayagbeechaaw ree guial Dios rüjn perdon xtol ree bejn guial rliladx reeman Jesucrist, ad guial rüjnt bejn nagueijn güünman gra ni rniabee ley guin.

²⁹ ¿Wen xDiosi ree bén Israel naj Dios ya, ad nët ree bén ad najt bén Israel naj xDios laaman ya? Naj rni lojdi guial Dios naj par gra bejn, ³⁰ din tijbzi Dios yu', laaman rüjn perdon xtol ree bén rliladx Jesucrist, yu'man o ad yu'taman sen ni rniabee ley chu' ree bén Israel. ³¹ Ad naladxidi cayguieen ree ley guin tiblax guial raliduladx ree Jesucrist, din ad ziantan, guial raliduladx ree laaman rguien guial nadxu'guijc ree ley guin.

4

Xguialrliladx Abraham

¹ Yan, ¿xhie zajc yaguie'ch ree xcwent dux béngulal ree Abraham? ² Bal niyab Abraham zi'c tijb bén gad güün dol por ree ni beenman, guyu mod nünman nabë loj ree bejn, per ad lojt Dios.

³ Din r eb loj xtiidx Dios: “Guial bililadx Abraham Dios, zeel been Dios laaman cwent zi'c tijb b en ad beent dol.” ⁴ Chi r ujn bejn dxiin, milia ni rajxaman ad ni razaladxt reeman, rtia'man laan por dxiin ni r ujnman. ⁵ Per guial gac bejn perdon loj Dios, ad zajct gui eb bejn guial rayalaman perdon guin por ni beenman, din achut naya loj Dios. Perdon guin z eedan guial rliladx bejn Jesucrist, zeel r ujn Dios bejn cwent zi'c b en ad yu't xtol. ⁶ Zi'c gunee rey Davi guial xiquilbaa ree b en been Dios cwent sin dol sin guial g un reeman xhienin par yayal reeman perdon guin. ⁷ R ebaman:

Xiquilbaa ree b en been Dios perdon xtol,
b en ma badxi'caman xtol.

⁸ Xiquilbaa ree b en ma been Dios cwent sin dol.

⁹ Ad gunee Davi diidx guie ree naabzi par b en yu' ree sen ni ru ree b en Israel, gunee man diidx guin ree par gra ree bejn. Din zi'c ma raguie'ch ree, Dios been Abraham cwent zi'c b en ad yu't xtol guial bililadxaman laaman. ¹⁰ Abi' chi biyabaman zi'c b en ad yu't xtol, ni'qui gadaman chu' sen ni ru ree b en Israel, chi gad Abraham chu' sen guin mal n ujn Dios laaman cwent zi'c b en ad yu't xtol. ¹¹ Chi biabaman zi'c b en ad yu't xtol, dxeel guyuman sen guin din sen guin naj guial ma n ujn Dios laaman cwent zi'c b en ad yu't xtol guial bililadxaman laaman. Zeel naj Abraham dad par ree b en rliladx Dios, majsi ad yu't reeman sen ni ru ree b en Israel, per por guialrliladx guin n ujn Dios laa reeman cwent zi'c b en ad yu't xtol. ¹² Naj t ee Abraham dad par ree b en majsi yu' sen guin per rliladx reeman zi'c bililadx Abraham Dios diizd chi gadaman chu' sen guin.

Promejs ni been Dios loj Abraham

¹³ Chi been Dios promejs loj Abraham n  loj ree xdiaaman, guial gud edaman guidib guidxliuj loj reeman zi'c tijb ni bayal reeman, ad beent Dios promejs guin loj Abraham guial beenman zi'c rniabee ley, beenman promejs guin guial bililadxaman laaman, zeel beenman laaman cwent zi'c tijb b n ad yu't xtol. ¹⁴ Yan bal ganaxzi ree b n zinal ley guin tia' ni gud e Dios, achet cwent naj guialrliladx ree bejn laaman, ache t et cwent naj promejs ni been Dios loj Abraham. ¹⁵ Din ley guin najn par castizi, per lod ad yu't ley, ad yu't mod chu gui b guial ad cay jnt bejn ley guin cumplid.

¹⁶ Zeel chi been Dios promejs loj Abraham guial gud edaman ni r baman par gra ree xdiaaman, beenman promejs guin lojman guial bililadx Abraham guin laaman, din guiguien guial najman benza'c abi' ad parzi ree b n zinalt ley guin naj promejs guin, n gajc par ree b n rliladx Dios zi'c bililadx Abraham majsi ad rajpt reeman ley guin. Zeel naj Abraham dad par dugra ree. ¹⁷ Zi'c ca loj xtiidx Dios lod r baman loj Abraham: “L j gac dad par zien ree b nguidxliuj.” Zian naj promejs ni been Dios loj Abraham, Dios b n rusban ree beng t abi' rnieeman xcwent ree ni gad chu' loj guidxliuj guie zi'c rul u ma yu' reen.

¹⁸ Majsi ragbeechaaw Abraham guial ad zajctaman famil, per chi r b Dios lojman zian, bililadxaman ni r b Dios, bililadxaman guial gac gra ni r baman lojman. Zianan zeel najman dad par gra ree b n rliladx Dios zi'cgajc laaman. Zi'c r b Dios lojman, chi r baman: “Zian gaquil famil, d d famil narooob gaquil.” ¹⁹ Cost tibgayuu ijz ma yu'

Abraham nadxel, ragbeeman guial ma naj reeman bengol në xbéngunaaman Sara guial chu' xi'n reeman, per ad guyunawëëgtaman, bililadxaman ni rëb Dios lojman. ²⁰ Ad yu't dxej ad bililadxaman ni rëb Dios. Diidxli bililadxaman laaman abi' rudëëman quixtëë lojman, ²¹ din guidi-blagaa bililadxaman guial rajp Dios guialrniabee güünman zi'c ma rëbaman. ²² Zeel been Dios cwent Abraham zi'c tijb bén ad yu't xtol.

²³ Abi' lod rëb guial been Dios laaman cwent zi'c bén ad yu't xtol guial bililadxaman laaman, ad tijbtzi Abraham ruza't yagaj, ²⁴ nëgajc dunuj ree din ma raliduladx ree Dios. Abi' në dunuj ree ma nüjnman cwent zi'c bén ad yu't xtol, Dios bén basban Dad Jesucrist loj guialgüjt, ²⁵ Dad Jesucrist bén güt por dux tol ree, dxel babanman abi' por laaman ma naya ree loj Dios.

5

Chi ma naya bejn loj Dios

¹ Ma nüjn Dios dunuj ree cwent zi'c bén ad yu't xtol guial raliduladx ree laaman, zeel ma nadxu' ree zagdxe con laaman por xguialgüjt Dad Jesucrist. ² Din guial raliduladx ree Jesucrist ma zajc yadxin ree loj Dios abi' nadxu'guijc ree ni ma beenman por dunuj ree, zeel dád nix yu' du luxdoo ree din ralëöz ree yayal ree xanyabaa lod za'man. ³ Abi' ad ziantzi, në guial yu' du luxdoo ree zagdxe por guialrzagdiaj ni radüüd ree, din rayagbee ree por guialrzagdiaj guin yasiid ree yaya'p ree pasens. ⁴ Abi' por pacens guin yasiid ree yadaan ree ni gui'tzi, abi' guial yadaan ree ma

zajc yadxin ree loj Dios. ⁵ Ni ralëez ree por Dios, ad zasa'nxtutan dunuj ree, din rayagbee ree guial rën da'taman dunuj ree por xSprijtaman bèn ma baneeman duloj ree.

⁶ Gocli babajn ree ad bile't naguieen ree xhienin din güün Dios dunuj ree perdon. Per chi bidxin dxej bi't Cristo güjtaman por dunuj ree nayajc ree bëndol. ⁷ Dunuj ree rayagbee guial nawëeg naj chu' bèn tiëb guiët por zatijb bejn. Ni'czi por tijb bèn naban xnejz, o wed yu' bèn tiëb guiët por tijb benza'c da't. ⁸ Per Dios ma balüüman guial rënman dunuj ree, zeel güjt Jesucrist por dunuj ree majsi nayajc ree bëndol. ⁹ Per yan ma naya ree loj Dios por xguialgüjt Jesucrist, abi' ad ziantzi, në ad zayaltri ree xcasti Dios chi guidxin dxej. ¹⁰ Din chi ad bile't nadxin ree loj Dios, laaman guxhal nejz guin por xguialgüjt Xi'nman Jesucrist, diidxgui yan ad züjntaman dunuj ree perdon ya, guial ma nabajnnë' ree Jesucrist, bèn guxhal nejz par loj Dios. ¹¹ Abi' ad laatzan, në guial yu' du luxdoo ree nix radëed ree quixtëe loj Dios por Dad Jesucrist, din por laaman ma naxu' ree zagdxe con Dios.

Adán në Cristo

¹² Por tijb xinguaaw guzuloj guyu dol loj guidxliuj, abi' por dol guin guzuloj guyu guialgüjt, gra ree bejn bayal guialgüjt guin guial been reeman dol. ¹³ Diizd chi gad ley ni badëed Dios loj Moisejs chu' mal yu' dol, per guial achet ley guyu naxel, achut zajc guiëb guial cayüjn bejn dol. ¹⁴ Per majsi zian, bidxinczi dxej ni güt reeman, diizd xtiamp Adán xt xtiamp Moisejs, majsi ad

beent reeman lasa' dol ni been Adán. Abi' tiampzii Adán gojc tijb sen par tijb bén naj gui't.

¹⁵ Din garen naj dol ni been Adán guial loj perdon ni zëed por Dios. Por xtol tijb bejn guzuloj guyu guialgüjt par gra bejn, per por tijb bejn zëed xperdon Dios, abi' laaman naj Jesucrist. Por Jesucrist rüjn Dios dunuj ree perdon, abi' ni been Jesucrist naj ni mazri lasajc, në ni mazri zagdxe par zien ree bejn. ¹⁶ Din garen naj dol ni been Adán guial loj perdon ni runee Dios. Por tijb dol bi't xcasti Dios, per por Jesucrist ma zile' gac bejn perdon, majsi ma beenman zien dol. ¹⁷ Por dol ni been Adán bi't guialgüjt par gra ree bejn. Per por ni been Jesucrist bi't perdon par gra ree bén rililadx guial por Cristo ma naj bejn naya guidiblagaa loj Dios, abi' gap reeman guialnaban tiblayaa con laaman.

¹⁸ Abi' guial bi't guialgüjt zi'c tijb casti par gra ree bejn por dol ni been Adán, ziangajc por ni zagdxe ni been Jesucrist ma zajc gap ree bejn perdon në guialnaban loj Dios. ¹⁹ Din por tijb bén ad bazoobt diidx gra bejn naj béndol. Per ziangajc por tijb bén bazoob diidx ma zajc gap bejn perdon loj Dios.

²⁰ Abi' Dios badëë ley loj Moisejs, din por ley guin gagbee ree bejn guial cayün reeman dol. Abi' chi ragbee bejn guial cayünman zien dol loj Dios, ziangajc mazri benza'c naj Dios par güünman laaman perdon. ²¹ Guia'xchej gunabee dol bejn ree, abi' por dol guin guzuloj guyu guialgüjt. Per yan mazri nadxu'guijc ree guial rën Dios dunuj ree, din guial rënman dunuj ree nünman dunuj

ree cwent sin dol, abi' yaya'p ree guialnaban con laaman por dux Dad ree Jesucrist.

6

Ma bay jt ree par dol per nabajnn ' ree Jesucrist

¹ Ad naladxidi canin lojdi guial yaguieen ree dol mazri din gui n Dios dunuj ree mazri. ² Din ad ziantan, ma bay jt ree par dol ad rayaltri yaguieenz yaguieen ree dol. ³ Din gol bignia' guial chi barobnijs ree por Jesucrist, laan naj zi'c rul u guial n  dunuj ree ma bay jt con laaman. ⁴ Chi barobnijs ree r n gui ban guial ma baxa'tyuj ree con Cristo, ma bay jt ree con laaman din ziangajc zi'c babanman por xguialrniabee Dios ziangajc zajc guidxaa mod ni nabajn ree, yabajn ree zi'c r n Dios.

⁵ Abi' bal chi barobnijs ree ma nayajc ree tijbzi con Jesucrist loj xguialg jtaman, zi'c babanman ziangajc yaban ree. ⁶ Din dunuj ree rayagbee guial chi g t Jesucrist loj cr jz, g jtaman por gra ni baguieen ree yaloj chi gad ree yaguieenbee laaman, abi' yagaj gunijt zi'c babajn ree yaloj, din ma naj naw eg g un dol dunuj ree gan din ad rniabeetri dol guin dunuj ree. ⁷ Din b n ma g jt por dol, ad rniabeetri dol guin laaman. ⁸ Abi' guial g jt Jesucrist por dux tol ree, zeel ma bay jt ree par dol guin, yabajn t e ree con laaman. ⁹ Din dunuj ree rayagbee guial chi baban Jesucrist ad yu'tri dxej gui taman din ad rniabeet guialg jt laaman. ¹⁰ Con tivoltizi g jt Jesucrist por xtol ree bejn, yan ma nabanman par Dios. ¹¹ Ziangajc l jt gol been cwent guial ma g jtidi par dol, abi' ma

nabandi par Dios guial ma najdi tijbzi con Dad Jesucrist.

¹² Zeel la'tgaj nabandi loj guidxliuj guie ad tiëbidi nabee dol lëjt, ad tiëb tëëdi güün ree xgabdxuudx lëjt gan. ¹³ Ad cwëeladx lëjt gajc loj dol par güündi ni mal, zagdxeli gol cwëjb nabee Dios lëjt, zi'c tijb bén ma güjt, abi' yabandi par laaman. Gol cwëjb nabeeman lëjt par güündi ni zagdx. ¹⁴ Zian ad zanabeetri dol lëjt, per ad por guial yu'guijctidi ni rëb ley ad güündi, ad zanabeetri dol guin lëjt por guial zinalidi guial rën Dios lëjt.

Ma gulaa ree loj dol

¹⁵ Ad canitan por guial ma zunaal ree guial rën Dios dunuj ree yan, zeel ma zajc yaguieen ree dol guial ad zunaaltri ree ley, din ad ziantan. ¹⁶ Lëjt ragbee bal yu' chu rniabee dunuj ree, yazoob ree xtiidx bén rniabee dunuj ree. Yan bal dol guin rniabee lëjt yayalidi casti, per bal ruzoobidi xtiidx Dios dxel ma rayalidi perdon. ¹⁷ Per quixtëë Dios guial majsi guia'xchej gunabee dol lëjt, per yan con guidib luxdoodi ma zinalidi xtiidx Dios zi'c ma basiididi. ¹⁸ Abi' yan guial ad rniabeetri dol lëjt, ma nabandi din güündi zi'c rën Dios. ¹⁹ (Canenë'n lëjt con ganax diidx ni zajc chignia'di xhie rën guiëb ni canin, din ragbeen guial nawëëg naj chignia'di ni guin ree.) Zi'c gunabee dol lëjt guia'xchej persi beendi ni dxuudx ree në graloj ree ni mal, ziangajc yan guidiblagaa gol cwëjb nabee Dios lëjt din gac güündi ni zagdx guiban tëëdi zi'c rënman.

²⁰ Chi gunabee dol lëjt ni'quid guyutidi xgab nibajndi zi'c rën Dios. ²¹ Per, ¿xhieza gan beendi por ni mal ni beendi nadxel, ni mal ni ratunëdi

yan guial ma ragbeedi por laan zëed xcasti Dios?
²² Per yan guial ad rniabeetri dol lëjt ma zinalidi xnejz Dios, abi' laan naj ni zagdxé din por zian ma zajc guibandi zi'c rën Dios gap tëedi guialnaban tiblayaa con laaman. ²³ Din ni rüjn bejn gan por dol laan naj casti, per ni razaladx Dios naj guialnaban tiblayaa par ree bén ma naj tijbzi con dux Dad ree Jesucrist.

7

Ni naj zi'c guialruxhliaa

¹ Compniar raliduladx ree Jesucrist, lëjt ragbee xhienaag naj tijb ley. Ley guin naj ni rniabee bejn la'tgaj nabanman. ² Laan naj zi'c chi ruxhliaa bejn, ad zajct guxhliaanëman ben ren la'tgaj naban lacheelaman. Per bal guiët lacheelaman dxel ad yu't ley ni gudxoon guial guxhliaanëman ben ren. ³ Zeel bal naban lacheelaman abi' guchajgaman ben ren, dolan cayüjnman. Per bal ma güjt lacheelaman dxel achet ley gudxoon guial guxhliaanëman ben ren ad cayüjn tëëtaman dol.

⁴ Ziangajcan lëjt compniar raliduladx ree Jesucrist, por xguialgüjt Jesucrist ma güjtidi par xley Moisejs. Yan ma najdi xbejn Cristo bén baban zatijb, abi' zian ma zajc yaguieen ree zi'c rën Dios yaguieen ree. ⁵ Din chi babajn ree zi'ctzi bayën ree, mazri baguieen ree ni rudxoon ley guin yaguieen ree abi' bunaal ree ni mal ni rayal casti. ⁶ Per yan guial ma bayëjt ree par ley guin, yan guial ad rniabeetri ley guin dunuj ree guial ma bidxaa tëe mod ni nabajn ree, ma zajc yaguieen

ree zi'c rën Dios por xSprijtaman bén nabajnnë' ree, ad guial nadxu'guijct ree ley guin.

Ley con dol

⁷ Ad canitan lojdi guial ni mal naj ley guin, din ad ziantan. Din bal id ley guin ad zagbeetan conin naj dol, ad zagbee tëëtan guial dol naj gualrzëëbladx, bal id rëb loj ley guin: “Ad sëëbladxil.” ⁸ Per chi gogbeen guial ni mal naj gualrzëëbladx, mazri gojcxhiey da dolan por gra ni guzëëbladxan. Bal id yu' ley, ad zagbeet bejn xhienin naj dol. ⁹ Chi gadan günbee ley guin, par naj zagdxe nabanen. Per chi benbeen ley guin, gogbeen guial cayünan dol abi' por dol guin rayalan casti. ¹⁰ Bi't ley guin din gagbee bejn xhienaag guibanman, per par naj bi'tzan par gudëëdan naj casti. ¹¹ Din basquiee dol guin naj guial zile' günan gra ni rniabee ley, per por ley guin gajc gogbeen guial castizi rayalan.

¹² Zeel ad ni malt naj ley guin din loj Dios zëëdan abi' gra ni zëëd loj ley guin loj Dios zëëdan, abi' zagdxe xnejz tëë naj ni rëb loj ley guin. ¹³ Ad ley guint rajp dol guial rayalan casti, dol guinan naj ni basquiee naj din günan ni rayal casti. Abi' por ley guin gogbeen guial ni dxuudx da't naj guial güün bejn dol.

¹⁴ Dunuj ree rayagbee guial por Dios zëëd ley guin, per guial najn bénguidxliuj zeel zianczi rüjn dol guin naj gan. ¹⁵ Ad rignia'tan xhienin rajcan, din ad rüntan ni rënan, aal ni ad rëntan rünan. ¹⁶ Abi' chi rünan ni ad rëntan günan, zian ragbeen guial ni zagdxequi naj ley guin, din por ley guin ragbeen xhienin cayünan. ¹⁷ Zeel ad najtczi rün guial rünan ni ad rëntan, rünan laan guial najn

béndol, abi' zianczi rüjn dol guin naj gan. ¹⁸ Din guial najn bénguidxliuj, ragbeen guial ni'czi ta'n ad najtan benza'c, majsi rēnan gūnan ganax ni zagdxe, per ad rajctan. ¹⁹ Ad rüntan ganax ni zagdxe ni rēnan gūnan, aal ganax ni mal rūnan ni ad rēntan gūnan. ²⁰ Yan bal rūnan ni ad rēntan gūnan, ad najtczi rūn par gūnan laan, rūnan laan guial najn béndol abi' zianczi rüjn dol naj gan.

²¹ Ragbeen guial majsi rēnan gūnan ganax ni zagdxe, per laa za' gajc dol guin par güūnan naj gan. ²² Dád ruladxan gra zi'c rniabee Dios gūnan, ²³ per yu' ni rudxoon gūnan laan, abi' ni rudxoon guin naj dol, guial sta naban dol guin luxdon abi' zianczi rüjnan naj gan.

²⁴ ¡Prob naj! ¿Chu zajc yabēē naj loj casti rayalan por dol ni rūnan guial naj naj bénguidxliuj? ²⁵ Per quixtēē Dios guial por dux Dad ree Jesucrist ma gulaan loj casti guin. Diidxliczi da xgaban naj guial gūnan ganax ni rniabee Dios, per guial najn bénguidxliuj zeel zianczi rüjn dol guin naj gan.

8

Guialnaban runee xSprijt Dios

¹ Gra ree bén rililadx Jesucrist ad rayaltri reeman xcasti Dios, bén ad nabantri ree zi'ctzi rēn reeman, laa reeman ma rüjn reeman naguiejn naban reeman zi'c rniabee xSprijt Dios. ² Din por xguialrniabee xSprijt Dios, bén runee guialnaban duloj ree guial ma nayajc ree tijbzi con Jesucrist, ad rniabeetri dol dunuj ree ad zayal tēetri ree xcasti Dios. ³ Guial nayajc ree bénguidxliuj ad bile't nüjn ley dunuj ree yudar, ley ni badēēd Dios loj Moisejs.

Per yan ma been Dios ni ad bile't n jn ley guin. Laaman guxhaal Xi'n loj guidxliuj zi'cgajczi tijb b nguidxliuj persi g jtaman por dux tol ree chit e nabeeri dol dunuj ree. ⁴ Laaman been zian, din yaguieen ree zi'c r nman zi'cgajc tijb b n cay jn zi'c rniabee ley guial ad nabantri ree zi'ctzi ray n ree, ma nabajn ree zi'c rniabee xSprijt Dios.

⁵ B n naban ree zi'ctzi naj xixgab reeman, mazri yu'guijc reeman g n reeman zi'ctzi r n reeman. Per ree b n naban zi'c rniabee xSprijt Dios, mazri yu'guijc reeman g n reeman zi'c rniabee Sprijt guin. ⁶ Guial yu'guijc bejn g nman zi'ctzi naj xixgabaman zeel z ed casti. Per b n yu'guijc g n zi'c rniabee xSprijt Dios, zajpaman guialnaban con Dios yabe'cdxe t e Dios luxdooman. ⁷ B n yu'guijc ree guiban zi'ctzi naj xixgab reeman, rdxe'ch Dios laa reeman din ad r nt reeman guzoob reeman xtiidxaman ad rile' t et g n reeman zi'c r nman. ⁸ Zeel b n naban ree zi'ctzi naj xixgab reeman, ad ruladxt Dios ni r jn reeman.

⁹ Per l jt ad nabantridi zi'ctzi naj xixgabidi, ma nabandi zi'c rniabee xSprijt Dios, bal wali ma nabann di xSprijt Dios. Din b n ad nabann t xSprijt Dios, ad najtaman xbejn Cristo. ¹⁰ Per bal ma nabann di Cristo, r n gui ban guial ma g jtidi par dol, ma nabann di xSprijt Dios din ma n jn Dios l jt cwent sin dol. ¹¹ Abi' bal ma nabann di xSprijt Dios, b n basban Jesucrist loj ree beng t. Majsı gui tidi per zasban Dios l jt din tia'di zatijb guialnaban por xSprijt Dios b n nabann di.

¹² Zeel yan compniar raliduladx ree Jesucrist, ad rayaltri yabajn ree zi'ctzi naj dux xgab ree.

13 Din bal nabandi zi'ctzi naj xixgabidi, dxel yayalidi casti, per bal por xSprijt Dios b n nabann di ma basa'ndi dol tibladi dxel ma gapidi guialnaban tiblayaa con Dios.

14 Gra ree b n rti jb rniabee xSprijt Dios laa reeman, laa reeman naj xi'n Dios. 15 Din ad nabann t reeman xSprijt Dios par guidxeb reeman, zi'c rdxeb tijb bejn xpatronman, por Sprijt guin ma naj reeman xi'n Dios. Abi' por Sprijt guin raguie'ch ree loj Dios: "iDad!" 16 Din xSprijt Dios rusni dunuj ree persi rayagbee ree guial ma nayajc ree xi'n Dios. 17 Abi' guial nayajc ree xi'n Dios dxel ma rayal ree ni guneeman zi'cgajc Jesucrist, bal wali yadaan ree gualzi zi'c laaman din yayal ree xanyabaa lod zojbaman.

18 Ma benan xgab guial achet lasajc guialrzagdiaj ni cayd ud ree yan guial loj guialnaza'c ni yaca' ree xanyabaa. 19 Abi' xt gra ree ni badxe' Dios loj guidxliuj, ma r n nejzdoo reen guidxin dxej guiguien chu ree nin naj xi'n Dios. 20 Din guidxliuj ma guxinan, per ad laatan rajp dol, Dios basa'n gac zian. Yan cab si guidxliuj guin 21 yariin loj ree ni dxuudx ni yu', din yayajc nix da't zi'c goc chi gurechaawan, zi'cgajc laa ree xi'n Dios loj ree nidxuudx yu' loj guidxliuj guie. 22 Per la'tgaj cab z guidxliuj guin guidxin dxej guin, dunuj ree rayagbee guial d d naya cazagdiajn zi'c rzagdiaj tijb b ngunaa chi ma gal xi'nman. 23 Abi' ad tijbtizi guidxliuj guin cazajc zian, n gajc dunuj ree guial nabajnn ' ree xSprijt Dios zi'c tijb sen por ni guneee Dios duloj ree. Abi' cayzaagdiaj ree la'tgaj cayl jz ree guidxin dxej ni guiguien guial nayajc ree xi'n

Dios, dxej ni guidxaa dux cuerp ree chi yaya'p ree cuerp c ub. ²⁴ Dunuj ree rayagbee guial gac zian, laan naj ni ral ejz ree guialraliduladx ree ma nayajc ree perdon. L ejt ragbee bal ni ral ejz ree ma gojcan, ad zal  eztri reen din ad zajctri cw ez bejn ni ma gojc. ²⁵ Per bal gad ni cayl ejz ree gac, ad rayalt yadxag ree yal  ez ree gacan.

²⁶ Abi' xSprijt Dios ragn e dunuj ree chi ad rayagbeet ree xhie yaguieen ree, din yu' dxej loj hor guin ad rile't yarejdx yanaab ree Dios zi'c rayal. Abi' chi ad rayagbeet ree xhienaag yaguie'ch ree loj Dios, xSprijt Dios mal ragbee dux quiarguiejn ree, dxel laaman rbejdx rniab Dios por dunuj ree. ²⁷ Abi' Dios, b en n unbee luxdoo gra ree bejn ragbeeman xhienin canab Sprijt guin lojman por dunuj ree. Din chi rniab Sprijt guin por ree xbejn Dios, laaman rniab por ree bejn zi'c r en Dios.

Achet zajc g  un dunuj ree gan

²⁸ Dunuj ree rayagbee guial gra ni cayza'c ree loj guidxliuj guie naj ni g  un sirv par dunuj ree guial ray en ree Dios, dunuj ree guial bazoob ree xtiidxaman par yaguieen ree zi'c r enman. ²⁹ Abi' diizd guia'xchej ma ragbee Dios chu ree nin chililadx laaman abi' gulejman laa reeman din guiban reeman zi'c Xi'nman Jesucrist, din Jesucrist naj b en nabee loj gra ree b en naj Xi'n Dios. ³⁰ Gra ree b en ragbee Dios guial chililadx reeman laaman, rbejdxaman laa reeman din gac reeman xbejnman, r jnman laa reeman cwent sin dol abi' rud eeman xanyabaa loj reeman lod zobjaman.

³¹ Yan, guial ma rayagbee ree gra ree ni guie, achet g  unan chut  ez g  un xcontr dunuj ree,

dunuj ree rayagbee guial Dios gagnë dunuj ree. ³² Ad gurexuut Dios nudëë Xi'nman din guiëtaman por dunuj ree. Yan nacli Xi'nman baneeman persi güjtaman por dunuj ree, ¿diidxgui ree ni ren ree nid zuneeman duloj ree ya? ³³ ¿Chu zajc cwe'c dux guialquia ree nayajc ree bén ma gulej Dios? Din Dios ma nün dunuj ree cwent sin dol. ³⁴ Achut zajc na guial rayal ree casti, din Jesucrist güjt persi gudixaman por dunuj ree. Abi' ad ziantzi, babanman abi' yan za'man xladbee Dios lod rnieeman por dunuj ree. ³⁵ Zi'c rën Cristo dunuj ree, achut zajc yala' dunuj ree con laaman. Ni'qui por guialyu'naya, o por guialzi, o por ni rün bejn dunuj ree, o por guialrliaan, o por guial ryaadx du xab ree, o por tijb ni nadxeb, o guial yayëjt ree, achet zajc yala' dunuj ree con laaman. ³⁶ Zi'c rëb loj xtiidx Dios:

Guial nayajcan xbejnl, zianczi nadxu'n loj guialgüjt.

Rüjnnë reeman dunujn zi'c ree xiil ma naj guiët.

³⁷ Per ni'qui tijb ni guin ad züjnt dunuj ree gan guial ragnë Cristo dunuj ree, bén rën dunuj ree.

³⁸ Ragbeechaawan guial ni'qui guialgüjt, ni'qui guialnaban, ni'qui ree anjl, o xindxab ree, o gra ree ni rajp guialrniabee, o ni cayajc, o ni zëed gac,

³⁹ o ni zëed xanyabaa, o lën liuj, ni'qui tijb ni been Dios, achetczi achut tëet zajc chiquied guialrën Dios dunuj ree por dux Dad ree Jesucrist.

9

Dios gulej bén Israel ree

¹ Lëjt ragbee guial naj naj xbejn Cristo, canin lëjt diidxli ad canitan lëjt ni rusquiee. Abi' naj ragbee guial xSprijt Dios ragbee guial diidxli naj ni canin lëjt, ² guial guixie guixie dád yu'naya luxdoon, xt ni'quid radxejlt xhie günan. ³ Balzianclaa majsi ad zayaltan perdon, majsi güün Cristo naj tiblax, per bal zian chile' günan yudar bén ladx reen chitëe yayal reeman casti. ⁴ Laa reeman naj bén Israel, abi' laa reeman naj bén gule Dios din gac reeman xbejnman. Abi' guzujman con laa reeman zi'c form tijb zaj, baya'nnëman laa reeman diidx conin güünman con tëënin güün reeman, badëe tëe xleyaman loj reeman. Rëbaman loj reeman xhienaag guiën reeman laaman, been tëëman promejs loj reeman. ⁵ Zëed reeman loj xdiaa ree bén been ree sirv loj Dios gulal, loj gajc ree bén zëed Cristo chi bi'taman loj guidxliuj, laaman naj bén nagle' zianczi rajp tëëman guialrniabee loj gra ni yu'. Amén.

⁶ Ad canitan guial ad züjntri Dios xpromejsaman cumplid, ni canin naj guial ad grat ree bén Israel naj xbejn Dios. ⁷ Ad guial zëedt reeman loj xdiaa Abraham din gac reeman xdiaaman, din rëb Dios loj Abraham: “Diizd xi'nl Isaac suloj xdiaal.” ⁸ Laan rulüü dunuj ree guial ad por guial najt bejn bén Israel, ma najman xbejn Dios, xbejn Dios naj ree bén naj cwent loj xdiaa Abraham guial rliladx reeman xtiidx Dios zi'c Abraham. ⁹ Din Abraham bililadxaman Dios chi rëb Dios lojman: “Zatib ijz tiamp guie gajc guialan abi' dxej zii ree ma ca' Sar tijb xindobëz.”

¹⁰ Abi' ad laatzan. Grop ree xi'n Rebeca gojc xdad reex Isaac, bén goc dux béngulal ree, ¹¹⁻¹³ per

chi gad reex gal, chi ad wayüjn tēet reex ni zagdxe ni'qui ni mal, rēb Dios loj Rebeca: “Xin yaloj guin laax güün sirv loj xinguiag guin.” Zi'c rēb loj xtiidx Dios lod rēb: “Guyēnan Jacob, per bidxe'chan Esaú.” Zian rguien guial ma ragbee Dios chu rbeman ad por ni rüjnt bejn, laaman ma ragbee chu rucaabeeman.

¹⁴ Yan, ¿por zian yaguie'ch ree ya, ad rüjnt xguialguxtis Dios zi'c rayal? ¿Per ad ziantan! ¹⁵ Din Dios rēb loj Moisejs: “Yayan bén rēnan yayan abi' bén rayal ree casti, bal rēnan ad zudēēdtan laa reeman casti.” ¹⁶ Zeel ad zile't yaya Dios bejn por xixgabzaman o por ni rüjnman, laaman mal ragbee chu rēnman yayaman. ¹⁷ Loj xtiidx Dios rēb guial rēbaman loj rey Egipto: “Naj ben lüj rey din guiguien da guialrniabeen din güünbee gra bénguidxliuj naj.” ¹⁸ Zeel rnin lojdi guial ma ragbee Dios chu yayaman chu tēē güünman luxdoo gojl.

¹⁹ Per wed por zian nadi: “Bal zianan, ¿chexquiza zeel rdxe'ch Dios guial nayajc ree zi'c nayajc ree awa ad zajct yadxoon ree zi'c naj xixgabaman?” ²⁰ Per, ¿chu naj bénguidxliuj din guinieeman Dios zian? Wen zajc guiēb tijb guiajs loj bén been laan ya: “¿Chexc zeel beenl naj zian?” ²¹ ¿Nid bén rüjn guiajs guin rüjnnē bajn guin zi'ctzi rēnman ya? Laaman ruguiaa xhie güünnēman bajn guin, bal güünman guiajs güün dxiin guixie guixie o güünman guiajs güün dxiin dxej zojblojzi ree.

²² Yan, ziangajc Dios ma ragbeeman chu rayal casti, abi' xt zajc laa nudēēd gajcaman casti din guiguien xguialrniabeeman. Per gudaanman gojp tēēman pacens bén ad ruzoobt ree diidx, bén

rayal ree nit. ²³ Gudaanman laa reeman din guigu-
ien guial laaman guinia xhienaag güünman, guial
laaman naj bén ca' guialrniabee abi' bayaman bén
ragbeeman diizd guia'xchej guial yayal reeman
xanyabaa. ²⁴ Abi' laa reeman naj dunuj ree bén
ma gurejdx Dios, loj ree bén Israel në loj ree bén
ad najt bén Israel. ²⁵ Zi'c ca loj libr ni bacaa Oseas
bén badëë xtiidx Dios loj ree bejn, lod rëb:

Bén ad najt ree da bejnan,
guiën loj reeman guial naj reeman da bejnan,
abi' ree bén ad yu't bén rën laa reeman,
naj guiën laa reeman.

²⁶ Abi' lod rëb Dios loj ree bejn: “Ad da bejntan
lëjt”.

Yagaj gac reeman xbejnman, laaman guial naj-
man bén naban.

²⁷ Guiáad Isaías bén badëë xtiidx Dios loj ree bejn,
rëbaman por ree bén Israel: “Majsi zien da't naj ree
bén Israel zi'c üx riga' ro' nijsdoo, per ta'nz naj ree
bén laa loj casti, ²⁸ din Dios nayob güün cumplid
xtiidxaman loj guidxliuj guie zi'c ma rëbaman.”

²⁹ Abi' diizd gocli rëb Isaías loj ree bejn:

Bal nitiëjb dux Dad ree Dios
bén rajp gra guialrniabee
ninijt gra ree dux bégulal ree,
diizd gocli mal gunijt dux diaa ree
zi'c gunit ree bén Sodoma në ree bén Gomorra.

*Bén ad najt ree bén Israel ma naj reeman perdon
loj Dios*

³⁰ Yan, ¿xhie yaguie'ch ree? Bén ad najt ree bén
Israel ni'quid guyut reeman xgab xhienaag gac
reeman perdon loj Dios, per yan ma naj reeman

perdon guial rliladx reeman Jesucrist. ³¹ Abi' ree bén Israel majsi dád been reeman naguiejn guiban reeman zi'c rniabee ley din gac reeman perdon loj Dios, per ad gojctan. ³² ¿Chexc zeel ad bile't niajc reeman perdon zian? Guial mazri been reeman naguiejn nibajn reeman zi'c rniabee ley luar nililadx reeman Dios zi'c rayal chililadx reeman din gac reeman perdon. Zian gojc Cristo par laa reeman zi'c tijb “guiaj ni rliadx guia' bejn” ³³ zi'c ca loj xtiidx Dios lod rëb:

Ma gulen tijb bejn luguiedx Sión, bén gac zi'c tijb
 guiaj
 ni ladx guia' ree bejn abi' gusajban laa reeman.
 Abi' bén chililadx laaman ad yu't dxej
 yaya'nxtuman.

10

¹ Compniar raliduladx ree Jesucrist, ni rënan rniaab tëen loj Dios naj guial gac ree bén Israel perdon. ² Din naj ragbee guial dád cayüjn reeman naguiejn cayüjn reeman sirv loj Dios, per diidxli ad rignia't reeman zagdxe xhienaag rën Dios güün reeman. ³ Din ad rtiëjbt reeman chililadx reeman xhienaag rayal güün reeman din gac reeman perdon loj Dios, al zinal reeman zi'c naladx reeman gac reeman perdon, luar güün reeman zi'c rën Dios din gac reeman perdon. ⁴ Din por Jesucrist bayaaloj zi'c rniabee ley güün bejn, yan bén rliladx ree laaman, ma naya reeman loj Dios.

⁵ Bén rën gac naya loj Dios guial zinalaman ley, rëb Moisejs guial bén güün zi'c tal rëb ley, zajpaman guialnaban la'tgaj cayüjnman zi'c rniabee ley guin. ⁶ Per guial rajc bejn naya loj Dios por

guial rliladxaman Jesucrist, naj guial ad z jntaman xgab: “ Chuczi zajc ch 'p xanyabaa?” (Din r n gui ban guial ad rliladxtaman, abi' r nman guguaaman guiat Cristo loj guidxliuj.) ⁷ Ad gui b t  man: “ Chu zajc che lod za' ree beng t?” (Din r n gui ban guial ad rliladxtaman, abi' r nman guguaaman yaban Cristo loj ree beng t.) ⁸ Per loj xtiidx Dios r b: “Gajxh za' xtiidx Dios con l j, ryaadxzi g  nl xgab gui b t  l bal chililadxil laan.” Din guialrliladx ni ratie'ch ree naj ze. ⁹ Bal yaneero'l guial Jes s naj Dad par l j abi' guidib luxdool chililadxil guial basban Dios laaman loj ree beng t, dxel ma najl perdon. ¹⁰ Din chi chililadx bejn Jesucrist con guidib luxdooman, diizd loj hor zii ma najman cwent sin dol. Abi' chi yaneero'man guial Jesucrist naj Dad par laaman, dxel ma najman perdon.

¹¹ Abi' loj xtiidx Dios r b: “Gra ree b en chililadx laaman ad yu't dxej yaya'nxtu reeman.” ¹² Laan r n gui b guial loj Dios tiblojzi naj bejn, achet g  nan chut  z najman, bal najman b en Israel o ad najtaman b en Israel. Din tijbzi Dios naj Dad par dugra ree, abi' d d benza'can con gra ree b en rbejdx rniab laaman. ¹³ Din loj xtiidx Dios r b: “Gra b en yanab perdon loj Dios, gacaman perdon.” ¹⁴ Per,  xhieza naag cwedx guiniab reeman laaman awa ad waliladxt reeman laaman?  Abi' xhieza naag chililadx reeman laaman awa ad wacaagdiajgt reeman xcwentaman?  Xhienaag guiguiejn reeman xcwentaman awa achut b en guinee xtiidxaman loj reeman? ¹⁵  Xhienaag chu' b en guitie'ch xtiidxaman awa achut guixhiaal laa reeman? Loj xtiidx Dios r b: “ Ni za'cdxoon naj chi

rdxin b en zin e rusion zagdxe!”

16 Per ad grat bejn ridxga' xtiidxza'c Dios. Zi'c r eb Isa as: “Dad,  chu ma rililadx ni ranen por l uj?”

17 Zeel guialrliladx z ed por ni rigueijn bejn, abi' ni rigueijn bejn naj xtiidxza'c Jesucrist.

18  Wen nid wagueijn ree bejn laan ya?  Per naj rni guial ma bacaagdiajg reeman laan! Din loj xtiidx Dios r eb:

Guidib guidxliuj ma bire'ch xtiidx Dios

abi' xt luar bigra lod naguie'ch ma bigueijn reeman xtiidxaman.

19 Yan r unan xgab:  Wen id rignia' ree b en Israel xtiidx Dios ya? Per diizd guia'xchej bacaa Moisejs ni r eb Dios por laa reeman chi r ebaman:

Naj g un din t edlojdi por ni g unan

con ree b en ad najt b en Israel.

N e por ni g unan con laa reeman,

majsi ad ragbeet reeman, abi' zadxe'chidi.

20 Abi' sin guialrdxeb bacaa Isa as ni r eb Dios por ree b en Israel, chi r ebaman:

B en naj ree b en Israel, majsi ad baguuilt reeman naj,

per badxejl reeman naj.

Abi' ma bal ulon loj reeman,

majsi ad gunabdiidxt reeman por naj.

21 Bacaa t e  Isa as ni r eb Dios por ree b en Israel, chi r ebaman: “D echej za'n rbedxan bejn ree abi' ad r ent reeman guzoob reeman diidx al rusagloj reeman naj.”

11

Xixgab Dios

¹ Ad canitan lojdi guial ma gulëladx Dios bén Israel ree, din ad ziantan. Lëjt ragbee guial bén Israel naj abi' loj xdiaa Abraham zialan, guial zialan loj xdiaa Benjamín. ² Diizd guia'xchej, gulej Dios bén Israel ree din gac reeman xbejnman, zeel ad rbëëladxtaman laa reeman. ¿Nid rusaaladxidi tiblajt loj xtiidx Dios ya lod zëed chi gule'c Elías bén badëë xtiidx Dios loj ree bejn xguialquia ree bén Israel loj Dios? Chi rëbaman: ³ “Dad, ma bagüjt reeman gra ree bén badëë xtiidxil loj ree bejn ma bachijl tëë reeman xialtar reel, najzi baya'n abi' nëgajc naj rën reeman gugüjt reeman.” ⁴ Per badxi' Dios xtiidxaman rëbaman: “Ma gulëcan gajdx mil bejn par naj, bén ad wazuxibtczi ree loj dios la Baal.” ⁵ Yan ziangajc yu' ta'n bén Israel, por guial rayaman laa reeman gulejman laa reeman par laaman. ⁶ Abi' bal guial rayaman laa reeman gulejman laa reeman, ad por ni cayüjnt reeman, din bal nibejman laa reeman por ni cayüjn reeman dxel ad por guial rayatraman laa reeman.

⁷ Zian gojc, bén Israel bén gule Dios, badxejl reeman laaman guial rliladx reeman laaman. Per ree bén Israel ren gad reeman yadxejl laaman, din raguiil reeman laaman zi'c naladx reeman, ad raguiilt reeman laaman zi'c rënman zeel beenman luxdoo reeman gojl, ⁸ zi'c rëb loj xtiidx Dios lod rëb: “Basiaaw Dios xquiarguejn reeman, abi' naj reeman zian xt yandxej, majsi ruguiaa reeman per rulüü ad ruguiaat reeman, abi' majsi riguejn reeman per rulüü ad riguejnt reeman.” ⁹ Rëb tëë Davi:
Xguialraw zagdxe reeman con gra xguialnaza'c reeman

laan gusquiee laa reeman guial źequi reeman za-gdxe.

Laan gusquiee laa reeman din t́ed reeman casti ni rayal reeman.

¹⁰ Yaya'n reeman zi'c tijb b́en ad ruguiaat, abi' sac reeman zi'c tijb b́en ca b́ew xijch.

Gac ree b́en ad najt b́en Israel perdon

¹¹ Ad canitan lojdi por guial ad rtíejbt ree b́en Israel ǵuún reeman zi'c ŕen Dios zeel ma gunijt reeman loj Dios, din ad ziantan. Guzajc reeman zian din chu' mod gac ree b́en ad najt ree b́en Israel perdon, din chile' śeébladx ree b́en Israel gap reeman perdon guin. ¹² Yan bal guial ad bazoobt ree b́en Israel diidx, beenan sirv par din yayal los demazri ree b́enguidxliuj xguialnaza'c Dios, b́en ad najt ree b́en Israel. Yan, ¿ŕunjdi xgab ya xhienaag ǵuúnle' Dios bejn ree chi tiéb ree b́en Israel ǵuún reeman zi'c ŕen Dios?

¹³ Yu' ni ŕenan ganin ĺejt b́en ad najt ree b́en Israel, ĺejt ragbee guial Dios guxhaal naj din ǵun xtiidxaman lojdi abi' d́ad cayúnan naguiejn ǵunan zi'c rayal. ¹⁴ Ŕenan guial ree b́en ladx ree b́en Israel ree śeébladx zi'c ŕunjdi din ǵuún reeman zian din chile' gac reeman perdon. ¹⁵ Walican guial chi ad bazoobt ree b́en Israel xtiidx Dios, guyu mod gojc los demazri ree bejn perdon. ¡Per xi nix chi chililadx reeman xtiidx Dios! Laan naj zi'c chi yaban tijb bengút zatijb. ¹⁶ Abi' zi'c chi beenle' Dios b́en Israel ree gulal laan naj tijb sen guial ǵuúnle'man los demazri ree b́en Israel, ziangajc bal ǵuúnle' Dios xliuj tijb yag guidib yag guin ma nagle'.

17 B́en Israel ree naj reeman zi'c tijb yag olivo, per yu' reeman naj zi'c xidx yag olivo guin ni ma gurug. Abi' lűj guial ad najtil b́en Israel najl zi'c tijb xidx yag olivo ni yu' dajn ni rguuid lod biru' xidx yag olivo guin, zeel rajpil guialnaban por xliuj yag guin. 18 Zeel ad naladxil guial mazri zagdxē najl guial loj yag oliv ni rnin naj ree b́en Israel. Per bal rűjnl xgab zian, basaaladx guial ad lűjt cudēē guialnaban loj xliuj yag guin, xliuj yag guin cunee guialnaban lojl.

19 Wed zanal: “Walican, per gurug xidx yag olivo guin persi guyu'n xluaran din gacan tijbzi con yag olivo guin.” 20 Waliquil, per xidx yag olivo ni canin naj ree b́en Israel, gurug reen guial ad bililadxt reen abi' lűj guyul xluar reen guial rliladxil. Zeel ad rűjnl nabē, zagdxeli gojp cudad. 21 Din bal b́en Israel ni canin naj ree xidx yag guin, ad bayat Dios laa reeman, ziangajc zajc saquil. 22 Gogbee guial benza'c naj Dios, per ziangajc diidxli rűjn xguialguxtisaman. Ma been xguialguxtisaman con ree b́en ad bazoobt xtiidxaman, abi' ma beenman ni zagdxē con lűj. Per rayal guibanl zi'c rēnman, bal id zűjnl zian zűjn xguialguxtisaman con lűj. 23 Abi' bal yayejc ree b́en Israel con Dios, abi' chililadx reeman perdon ni zēēd por laaman, zűjnman laa reeman cwent con los demazri ree b́en Israel rliladx. Din laaman rajp guialrniabee par yayűjnman laa reeman tijbzi con los demazri ree b́en Israel. 24 Din lűj guial ad najtil b́en Israel, lűj guial canin najl zi'c tijb yag olivo ni yu' dajn, zile' niajqul tijbzi con yag olivo zagdxē ni rnin naj ree b́en Israel, ǰdiixgui ree b́en Israel

ni ad ruzoobt ree xtiidx Dios, nid zayajc reeman tijbzi ya con los demazri ree bén Israel bal guzoob reeman xtiidx Dios!

Gac ree bén Israel perdon

²⁵ Compniar raliduladx ree Jesucrist, yu' ni ad ragbeetidi abi' rënan gagbeedan, chitëë güüнди nabë. Bén Israel rüjn ree nad par guzoob reeman xtiidx Dios, cayajc zian xt chi ma bayaaløj bililadx ree bén ad najt ree bén Israel, bén ma naj ree par chililadx xtiidx Dios. ²⁶ Chi ma gojc zian, dxel graczi ree bén Israel ma güüncwent xtiidx Dios. Zian gac reeman perdon, zi'c rëb loj xtiidx Dios lod rëb:

Luguedx Sión za bén gagnë ree bén zëed loj xdiaa Jacob.

Din yariica reeman loj nejz mal zinal reeman.

²⁷ Dxel gac cumplid da diidxan,

Zi'c ma rën loj reeman guial günan perdon xtol reeman.

²⁸ Per yan guial dád nad ree bén Israel par chililadx reeman xtiidxza'c Jesucrist, zian yu' mod persi rliladxidi guial ad najtidi bén Israel. Abi' majsi zian, rën gajc Dios laa reeman zi'c beenman promejs loj ree xbéngulal reeman. ²⁹ Din Dios ad ruchaat xixgabaman, ni ma bazaladxaman loj bejn, ad rquiedtaman laan, ad rbëeladx tëetaman bén ma gulejman par laaman. ³⁰ Gocli ad binaltidi xnejz Dios, per yan por ree bén Israel ad ruzoobt xtiidx Dios, ma balüüman lëjt guial rayaman lëjt.

³¹ Abi' bal yan ad ruzoobt ree bén Israel xtiidx Dios, cayajc zian din yayaman lëjt, per chi guidxin dxej ziangajc yayaman laa reeman. ³² Cwëjb Dios guial zi'c ree bén Israel në ree bén ad najt bén

Israel ad zuzoobt reeman xtiidxaman, din gac yayaman gra reeman tiblojzi.

³³ ¡Dád zro' naj xguialrignia' Dios, nē xguialrajcaman con xguialnaza'caman! Achut zajc gagbeechaaw xhienaag naj xixgab Dios o ni cayünman. ³⁴ Zi'c ca loj xtiidxaman lod rēb: “¿Chu zajc gagbeechaaw xhienaag naj xixgab dux Dad ree Dios? ¿Chu mazri rajc din guiēb lojman xhienaaag güünman? ³⁵ ¿O chu ma badēē xhienin lojman din cwēzaman quixaman laaman?” ³⁶ Xieenman naj gra ni yu', laaman been laa reen abi' par laaman naj gran. Zeel rayal gap bejn laaman respejt zianczi. Amén.

12

Guialnaban cüb

¹ Zeel compniar raliduladx ree Jesucrist, rniaaban lojdi, zi'c ma baya Dios dunuj ree, gol basa'n lējt loj Dios zi'c tijb gon ni ma nagle' ni yayuladx tēēman, din guibandi zi'c rēnman, abi' zian guiēndi laaman. ² Ad guibanridi zi'c naban los demazri ree bén yu' ree yan, zagdxeli gol bachaa xixgabidi din gac guidxaa zi'c nabandi abi' zian gagbeedi xhienaag rēn Dios guibandi. Zian gagbeedi conin naj zagdxe, conin ruladxaman, con tēēnin naj xnejz.

³ Guial naj Dios benza'c baneeman dxiin guie lon din guialan ganen xtiidxaman lojdi. Zeel rnin lojdi ni'qui tijbidi ad rayalt güün nabē guial mazri lasajquidi loj ree bejn. Zagdxeli gol been xgab por lējt zi'c rayal, segun naj quiarguejn ni banee Dios loj tijbgajdi. ⁴ Din zi'c xcuerp bejn zien la' najn, per ad tijbtzi ni rüjnan. ⁵ Ziangajc dunuj ree guial

raliduladx ree Jesucrist, majsi zien nayajc ree, per por guialraliduladx ree zeel nayajc ree tijbzi con Cristo, per tijbgaj dunuj ree con ni rayal yaguieen ree din yaguieen yudar du lasa' ree.

⁶ Din tijbgaj dunuj ree garent garen naj quiarguiejn ni baca' ree, zi'c naj ni guyën Dios baneeman dunuj ree. Zeel bal ma baneeman quiarguiejn du loj ree par yanee ree xtiidxaman, rayal yanee ree laan loj ree bejn, rayal yanee ree laan por guialraliduladx ree. ⁷ O bal baneeman quiarguiejn par yaguieen ree sirv ben ren ree, rayal yaguieen reen zi'c rayal. Bén cwa' quiarguiejn par gulüüman bejn ree xtiidx Dios, rayal gulüüman bejn ree. ⁸ O bén cwa' quiarguiejn par gudëëman consejw loj ree bejn, rayal gudëëman consejw. Guiáad bén cwa' quiarguiejn par yazaladxaman xhienin loj ree bejn, rayal yazaladxaman con guidib luxdoodan. Abi' bén cwa' quiarguiejn par nabeeman, rayal gapaman cudad nabeeman zi'c rayal, o bén cwa' quiarguiejn par güünman yudar bén cazagdiaj ree, rayal chu' luxdoodan zagdxe güünman laa reeman yudar.

Ni rayal güün ree bén rliladx Jesús

⁹ Gol guyën lasa'di con guidib luxdoodi, gol basa'n ree ni mal tiblax, gol binal ni zagdxe. ¹⁰ Gol guyën gra ree bejn zi'c tijb bijchidi, ad rüjn lëjt gajc benro', gol gojp respejt lasa'di.

¹¹ Ad gaquidi bén ploj par güündi ni rayal güündi, con guidib luxdoodi gol been sirv loj Dios.

¹² Gol badxe' luxdoodi zagdxe por ni cabëzidi tia'di, gol gudaan tëë loj ni rzagdiajdi, ad gucwëëz cwedx guiniabidi Dios.

¹³ Chi xhie ryaadx xcompniaridi, bén rliladx ree Jesucrist, gol been reeman yudar. Gol gojc benza'c con ree bén ri't lidxidi.

¹⁴ Gol gurejdx Dios por ree bén rzunal lëjt par güün reeman lëjt ni mal, ad guzaalidi diidxmal guijc reeman, gol gurejdx Dios guial gagnëman laa reeman.

¹⁵ Gol badxe' luxdoodi nix con ree bén yu' luxdoo nix, per con ree bén yu' luxdoo naya, gol been nagueijn din gagbee reeman guial za'quidi con laa reeman.

¹⁶ Gol gubajn zagdx con ree lasa'di, ad güüнди nabë, gol gojc bén naxanladx. Ad naladxidi mazri rajquidi guial loj ree ben ren.

¹⁷ Ad güüнди ni mal bén rüjn lëjt ni mal, gol been nagueijn güüнди ni zagdx loj gra ree bejn.

¹⁸ Gol been nagueijn da't din cwenëdi bejn ree zagdx. ¹⁹ Compniar raliduladx ree Jesucrist, ad rgu' guialxyajn luxdoodi con ree bén rüjn lëjt xhienin, gol basa'nan loj Dios, laaman güün xguialguxtis, zi'c rëb loj xtiidxaman, lod rëb: “Naj naj bén rayal güün xguialguxtis, gudë tëen ni rayal bejn. Zian rëb dux Dad ree Dios.” ²⁰ Rëb tëëman: “Bal rli-aan bén rdxe'ch lüj, badëed ni gawaman, o bal re'caman nijs, badëed ni guië'man, zian guguaal yatuman.” ²¹ Ad bal tiëbil güün ni mal lüj gan, been ni zagdx din güünl ni mal guin gan.

13

Royal yaya'p ree guxtis respejt

¹ Gra bejn rayal gucaagdiajg xtiidx gobiarn në xtiidx gra ree guxtis. Din por Dios yu' ree gobiarn në gra ree guxtis, por laaman zëed guialrniabee

ni rajp reeman. ² Zeel b en ad ruzoobt xtiidx ree b en rniabee guin, r n gui ban guial ad r nt reeman g  n reeman zi'c rniabee Dios. Abi' ree b en r jn zian laagajc reeman rguuil xcasti, ³ din b en rajp ree guialrniabee ad za't reeman par guchejb reeman b en r jn ree ni zagdx, za' reeman par guchejb reeman b en r jn ree ni mal. Yan bal r nl guibanl guial ad zadxebtil b en ca' ree guialrniabee, gubajn zagdx din yaya'nl zagdx loj reeman. ⁴ Din laa reeman cay jn reeman sirv loj Dios din yalaj reeman l j. Per bal cay jnl ni mal, zadxebil b en ca' ree guialrniabee, din ad ca' xlia'tzi reeman guialrniabee guin, laa reeman cay jn sirv loj Dios din gud ed reeman casti b en r jn ree ni mal. ⁵ Zeel rayal guzoobidi xtiidx ree b en ca' ree guialrniabee, ad g  ndi zian naabzi par ad zayaltidi casti, gol been zian guial ragbeedi zian rayal g  ndi. ⁶ Gol gudijx t e impuest, din gusnuu nabee ree b en ca' ree guialrniabee, din laan naj mandad bayal reeman par g  n reeman sirv loj Dios.

⁷ Zeel gol bad ed ni rayal gud edidi, bal rayal cwe'quidi milia, gol gule'can o bal rayal quixidi impuest, gol gudijxan. Gol bazoob xtiidx b en rayal guzoobidi xtiidx, gol gojp respejt b en rayal respejt. ⁸ Gol been naguiejn gol baguix ni ralidi loj ree bejn, abi' ad rayalt gucw ez gui ndi bejn ree. Din b en r n bejn ree, ma cay jnman cumplid gra ni rniabee xley Dios. ⁹ Xmandamient Dios r ban: “Ad sun l b en ren b en ad najt lacheelil, ad gug jtil bejn, ad cwanl, ad s ebladxil ni rajp ben ren”, per mandamient guie ree, con ree xmandamient ren Dios rajc cumplid con tijb mandamient r b:

“Guyën ben ren ree zi'c rën lüj gajc.” ¹⁰ Din bén rën bejn ree ad zajct güünman laa reeman ni mal guial rënman laa reeman. Zeel con guial rën lasa' bejn rayaaloj rüjnman gra ni rëb loj xley Dios.

¹¹ Gol gogbee xhie tiamp nadxu' ree yan, gol gogbee guial ma gojl yatie'ch dux bacaal ree. Din yan ma zidyob dxej gui't Jesucrist guial loj chi guzuloj qui baliduladxri ree xtiidxza'caman.

¹² Mazri caydop tiamp guin, abi' mazri cabig dxej gui'taman, zeel rayal yasa'n ree ni rinë dunuj ree loj nejz mal, abi' yaguieen ree naguieejn yaguieen ree ganax ni zagdxe din yunaal ree nejz zagdxe.

¹³ Rayal yabajn ree zagdxe zi'c rayal, ad yaguieen ree ni natu. Ad yazüdx ree, o ad rayalt yaguieen ree lanij naabzi par chu' mod yaguieen ree ni dxuudx. Ad rayalt sunë bejn ben ren bén ad najt lacheelaman, o guial gapaman graloj vijs, o guialrdil o guialrdëdloj. ¹⁴ Gol basa'n lëjt gajc loj dux Dad ree Jesucrist, ad rayalt guibandí zi'ctzi rëndi.

14

Ad gusa'nxtudi bén qui rliladxri xtiidx Dios

¹ Zagdxe gol guneenë bén qui rliladxri Jesucrist ad gusa'nxtudi laaman guial mazri rajquidi guial lojman. ² Din yu' ree bén rliladx Jesucrist naladx reeman zajc gaw reeman xhietëez nin, per yu' ree bén qui rliladxri naladx reeman guial zagdxeli naj ad zajwt reeman bëël. ³ Bén rüjn xgab guial zajc gawaman xhietëez nin, ad rayalt güünman tibläd bén naladx yu' ni ad zajct gaw bejn. Guiáad bén rüjn xgab guial yu' ni ad zajct gaw bejn, ad rayalt guze'man bén naladx zajc gaw bejn xhietëez nin.

Din niz loj Dios tiblojzi ma naj reeman xbejnman. ⁴Zeel,  chu naj bejn din guze' xcompniaraman b en rililadx Jesucrist por niguinzi ree? Diosqui rag-bee bal cay jnman ni zagdxo o cay jnman ni mal. Abi' bal ad wayignia'taman xhienaag g nman, dxel dux Dad ree Jesucrist rajp gualrniabee par gagn man laaman g nman zi'c rayal.

⁵Ziangajc yu' ree dux compniar ree b en raliduladxn ' ree Jesucrist naladx reeman gual yu' dxej zojbloj, yu'za ree b en naladx gual tiblojzi naj gra dxej, per achet g nan, tijbgaj bejn con ni naladxaman naj zagdxo par laaman. ⁶Din b en r jn xgab gual yu' dxej zojbloj, r jnman zian persi r nman Dios. Gui ad b en naladx gual tiblojzi naj gra dxej, r jnman zian persi r nman Dios. Abi' b en raw graloj, rawaman gual yu'guijcaman gual por Dios z edan abi' rud eman quixt  lojman. Gui ad b en naladx gual yu' ni ad zajct gaw bejn, r jnman zian gual naladxaman zian cayajpaman Dios respejt abi' rud eman quixt  lojman.

⁷Ni'qui du tijb ree ad nabant ree por dux xgabzi ree, o ad zay jt ree por dux xgabzi ree. ⁸Bal nabajn ree por dux Dad ree Jesucrist par laa t eman nabajn ree. Abi' bal yay jt ree por laaman par laa t eman yay jt ree. Zeel bal nabajn ree o yay jt ree, par dux Dad ree Jesucrist ma nayajc ree. ⁹Din par zian g jtaman abi' babanman, din gacaman Dad loj ree b en naban n  loj ree b en ma g jt.

¹⁰ Chexquiza din guze' lasa'l b en rililadx Jesucrist o g n lasa'l tiblax ya? Awa dugra ree rayal yadxu' loj Dios din yad ed ree cwent lojman.

11 Zi'c ca loj xtiidxaman lod rëb:

Naj naj Dios naban,

abi' diidxli rnin lojdi guial gra ree bejn guzuxib lon.

Abi' gra ree bejn guiëb guial naj naj Dios.

12 Abi' tijbgaj dunuj ree rayal yadëed ree cwent loj Dios, per por dunuj gajc ree.

Ad gusajbidi bejn loj dol

13 Zeel ad rayalt yaneeguijdx du lasa' ree bén riladx ree Jesucrist, zagdxeli yaguieen ree naguiejn yaya'p ree cudad chitëe por dunuj ree güün reeman dol. 14 Naj najn xbejn Jesús, ragbeen guial ad dolt naj gaw bejn xhietëëznin. Per par bén naladx guial ad zajct gawaman xhietëëznin, par laaman dolan cayünman bal gawaman xhietëëznin. 15 Yan bal por ni rawil naladx tijb xcompniaril bén riladx Jesucrist guial dolan cayünl, abi' bal id ridxga'l laaman rën guiëban guial ad rëntil laaman. Gojp cudad chitëe por ni rawzil güün xcompniaril dol, din nëgajc por laaman güjt Jesucrist loj crüjz. 16 Ad güünl tijb ni guinieeguijdx ree xcompniaril lüj, majsi lüj ragbee guial ad ni malt naj ni cayünl. 17 Niz loj Dios ad ni rawt bejn o ad ni rë'taman naj ni lasajc, ni lasajc par laaman naj guial guiban bejn xnejz, yabedxe luxdoo bejn, chu' tëe luxdoo man nix por xSprijt Dios. 18 Abi' bén naban zian guial zinalaman Jesucrist, cayünman zi'c rën Dios, zi'c ruladx tëe bejn.

19 Zeel rayal yaguieen ree naguiejn yabajnnë' du lasa' ree zagdx yabedxe tëe du luxdoo ree, din yasnuu yayagbee ree xhienaag yunaal ree xnejz Dios. 20 Gol gojp cudad chitëe por ni rawzidi

gunijtidi tijb xbejn Dios. Walican graczi zajc gaw bejn. Per ni mal guin naj bal par xcompniaril dolan cayüjnl. ²¹ Zeel zagdxeli naj guial ad zajwtil bëel ad zë' tëetil vin o xhie stijb nin bal por laan güün xcompniaril dol. ²² Majsì lüj ragbee guial achet güünan gaw bejn xhietëëznin, per zagdxeli lüjzi con Dios. Naj rni guial, ¡xiquilbaa bén ad yu'nawëëgt luxdoo rawaman xhietëëznin! ²³ Per bén yu'nawëëg luxdoo par gawaman xhienin, abi' gawaman laan laagajcaman ma cayüjn dol guial ad cayawtraman guidib ladxaman. Bal naladx bejn ad laat naj ni cayüjnman, dxel laagajcaman cayüjn dol.

15

Royal yaguieen ree ni naladx bejn naj zagdxë

¹ Yan, dunuj ree guial ma nadxu'dxi'ch ree loj ni raliduladx ree Jesucrist, royal yaguieen ree yudar bén ad wazudxi'cht loj guialrliladx Jesucrist luar yaguieen ree ni rayentzi ree, ² dugra ree royal yaguieen ree naguiejn din chu' luxdoo dux compniar ree zagdxë con dunuj ree. Abi' royal yaguieen ree ni naladx reeman naj zagdxë, din chile' gusnuu güünbee reeman xnejz Dios. ³ Din ni'qui Jesucrist ad beent zi'c naj xixgabaman, gojc zi'c ca loj xtiidx Dios lod rëb: “Naj bayal gra ree diidx mal ni ninia reeman lojl.” ⁴ Gra ni ca loj xtiidx Dios, can din yayagbee ree xhienaag yabajn ree, abi' por xtiidx Dios zëed pacens në guialragnë chitëë yalenyà' ree yalëjz ree ni ralëjz ree yaca' ree. ⁵ Dios, bén razaladx pacens në guialragnë chitëë yalenyà' ree, laaman gagnë lëjt

din guibandi nadxag con gra ree xcompniaridi zi'c naj xixgab Jesucrist. ⁶ Din tiblojzi guilies reeman xvalor Dios, xdad dux Dad ree Jesucrist.

Bire'ch xtiidx Dios loj ree bén ad najt bén Israel.

⁷ Zeel, zi'c baca' Jesucrist lëjt par gaquidi xbenman, ziangajc gol guneenë ree xcompniaridi zagdxë, bén rililadx ree laaman par guiliesidi xvalor Dios. ⁸ Gol basaaladx guial bi't Cristo loj guidxliuj par gulüüman bén Israel ree xtiidx Dios, zian bidgaguieenman sirv loj reeman, persi gojc cumplid promejs ni been Dios loj ree xbéngulal reeman, abi' zian biguien guial rüjnqui Dios cumplid xtiidxaman. ⁹ Bi't tëë Cristo loj guidxliuj din por laaman, bén ad najt ree bén Israel guilies reeman xvalor Dios guial rayaman laa reeman, zi'c ca loj xtiidxaman lod rëb: Xt loj ree bén ad najt bén Israel guzatan lüj guial najl benza'c.

Gol tëën cant ree par lüj.

¹⁰ Ziangajc rëb zatibljajt loj xtiidx Dios:

Lëjt bén ad najt ree bén Israel,
gol babaa zi'c rabaa ree bén Israel.

¹¹ Zatibljajt loj xtiidx Dios rëb:

Gra ree bén ad najt bén Israel.

Në los demazri ree bejn, gol gules xvalor Dios.

¹² Rëb tëë Isaías:

Loj xdiaa Isaí, grii tijb bén nabee bénguidxliuj ree,
xt ree bén ad najt bén Israel, chililadx laaman.

¹³ Dios bén ragnë dunuj ree ralëjz ree ni caylëjz ree, laaman yagu' luxdoodi zagdxë yabe'cdxë tëëman luxdoodi guial rililadxidi laaman, din cwëz da'tidi ni guneean por xSprijt Dios.

¹⁴ Compniar raliduladx ree Jesucrist, naj rag-beechaaw guial zagdx e nabandi con ree xcompniaridi, ma ragbee t́eedi zagdx e xhienaag chinalidi xnejz Dios, xt rajc rud́eedi consejw rulúu t́e xcompniaridi. ¹⁵ Per majsi zian, tio'p choon lajt loj gui'ch guie bacan diidx naa, din yasaaladxidi xhienaag guibandi. Rúnan zian por guialrniabee ni ma banee Dios naj, ¹⁶ din gúnan sirv loj Jesucrist. Din da dxiinan naj gulún b́en ad najt ree b́en Israel xtiidxza'c Dios din guiban reeman zi'c ŕen Dios, din gac reeman naya niz lojman por xSprijtaman. ¹⁷ Ra'pan xhie gúnne'n nabé, guial ragné Jesucrist naj por ree dxiin cayúnan por Dios. ¹⁸ Per achetczi zajc guién bal id zén guial por Cristo cayúnan laan, din laaman cayagné naj persi cayúnan yudar b́en ad najt ree b́en Israel din gac chililadx reeman guzoob t́e reeman xtiidx Dios. Yan ma rliladx reeman laaman por ni ŕen loj reeman né por guial ruguiaa reeman xhienaaag nabanán, ¹⁹ né guial ma baguiaa reeman sen ree con ree milagr ni ma gojc por xguialrniabee xSprijt Dios. Zian ma gutiechan xtiidxza'c Jesucrist guidibczi, diizd Jerusalén xt guidib niz Ilírico. ²⁰ Din zian naj da xgaban gúnan, gatie'chan xtiidxza'c Jesucrist. Per ad lod ma guzulojt ben ren con dxiin guie, gatiechanan lod ad waguiejntczi reeman xcwent Cristo, ²¹ zi'c ca loj xtiidx Dios lod ŕeb:

B́en ad waguiejnt ree xcwentaman,
gúünbee reeman laaman.

Guiáad ree b́en ad wayagbeet xcwentaman,
gagbee reeman laan.

R ijn Pab xgab cheman Roma

²² Abi' guial wan guidibczi lod ma rnin lojdi, zeel ad wayajct gan guidganan l jt, majsi zianczi guy enan nidganan l jt. ²³ Per yan guial ma gulox gutiechan xtiidx Dios guidib niz guie, abi' guial ma gojc zien ijz ni r enan guidganan l jt, ²⁴ zeel r unan xgab guidganan l jt chi gan Espa a. Abi' chi gad edan guguan l jt, chi ma gojc tio'p choon dxej yu' luxdoon zagdxe guial za'n con l jt, dxe ma g undi naj yudar din gan Espa a. ²⁵ Per yan yaloj gan Jerusal n chigsa'nan tijb yudar par ree dux compniar ree b en rliladx ree Jesucrist. ²⁶ Din b en Macedonia ree con ree b en Acaya b en rliladx gajc ree Jesucrist, been reeman xgab guto'p reeman yudar guin par ree b enprob zojb ree Jerusal n, b en rliladx ree Jesucrist. ²⁷ Abi' por xixgab reeman guixhiaal reeman yudar guin, per zagdxe naj ni cay jn reeman din mal nuz eb reeman loj reeman. Din por ree b en Israel bidxin xtiidx Dios loj reeman, dxe yan laa reeman guial ad najt reeman b en Israel, zagdxen guial g un reeman yudar b en Israel ree zi'ctzi gac reeman. ²⁸ Zeel chi ma balooxan dxiin guie, chi ma bay n yudar guin, dxe gan Espa a, abi' chi gad edan ladxidi dxe guidganan l jt. ²⁹ Naj ragbee guial chi guidganan l jt, zien da't ni gunee Dad Jesucrist par ganin l jt.

³⁰ Yan por dux Dad ree Jesucrist n  guial r n xSprijt Dios dunuj ree, rniaaban lojdi din g undi naj yudar yarejdx yanaab ree Dios por naj. ³¹ Gol gurejdx gunab Dios din gagn eman naj loj ree b en Judea, b en ad rliladxt ree Jesucrist, gol gurejdx t e Dios por dux compniar ree b en rliladx ree

Jesucrist, bën zojb ree Jerusalén din tiëb reeman tia' reeman yudar ni chigsa'nan par laa reeman. ³² Dxel bal gagnë Dios ma chu' luxdon zagdxë guidganan lëjt dxel ma zajc yaziiladxan la'tgaj za'n con lëjt. ³³ Dux Dad ree Dios bën rabe'cdxe du luxdoo ree, laaman gagnë gradi. Amén.

16

Rugajpdioz Pab bejn ree

¹ Yan ni gui't Febe ladxidi, béngunaa ni naj dux compniar ree guial raliduladx ree Jesucrist, bën cayüjn tée sirv lën yadoo ni zojb guiedx Cencrea.

² Gol baca'man zagdxë por Dad Jesucrist, zi'c rayal yaguieennë' ree dux compniar ree bën rliladx ree Jesucrist. Gol beenman yudar bal xhienin ryaadxaman, din dád zien ree bejn ma beenman yudar nëgajc naj ma beenman yudar.

³ Gol bagajpdioz Aquila con xbéngunaaman Priscila, bën cayüjn ree naj yudar cayguieenan sirv loj Jesucrist. ⁴ Abi' laa reeman xt guzuj reeman loj guialgüjt por naj, zeel rudën quixtëë loj reeman. Abi' ad najtzi rudë quixtëë loj reeman né ree dux compniar ree bën rliladx ree Jesucrist bën ad najt ree bën Israel rudëë quixtëë loj reeman.

⁵ Gol bagajpdioz ree bën rliladx Jesucrist, bën rado'p ree lidx Priscila con Aquila. Gol bagajpdioz da miwan Epeneto, bën goc bën yaløj bililadx xtiidx Jesucrist niz Acaya. ⁶ Gol bagajpdioz Li, bën ma been da't lëjt yudar. ⁷ Gol bagajpdioz ree bën ladxan Adrónico con Junias, bën guyu'në' reen ladxguuib. Abi' ree xi apóstoles Jesús dád rën

reeman laa reeman, abi' yaløj laa reeman bililadx Jesucrist guial lon.

⁸ Gol bagajpdioz Amplias, da miwan bén rën da'tan guial nayajcan xbejn Jesucrist. ⁹ Gol bagajpdioz Urbano, bén cayüjn naj yudar cayguieenan sirv loj Jesucrist. Gol bagajpdioz tää da miwan Estaquis. ¹⁰ Gol bagajpdioz Apeles, bén ma balüü guial diidxliczi rliladxaman Jesucrist, gol bagajpdioz tää xfamil Aristóbulo. ¹¹ Gol bagajpdioz tää Herodiön ben ladxan, në ree xfamil Narciso, bén ma rliladx Jesucrist. ¹² Gol bagajpdioz Trifena në Trifosa, bén cayüjn ree sirv loj Jesucrist. Gol bagajpdioz tää Pérsida, bén naguieenbee ree guial dád cayüjnman sirv loj Jesucrist. ¹³ Gol bagajpdioz Rufo, bén diidxliczi zinal xnejz Dios, gol bagajpdioz tää xniaaman, bén rënan zi'c da nan. ¹⁴ Gol bagajpdioz Asíncrito, Flegonte, Hermas, Patrobas, Hermes në gra ree bén za' con laa reeman, bén ma rliladx ree Jesucrist. ¹⁵ Gol bagajpdioz Filólogo, Julia, në Nereo con bizanman, në Olimpás con gra ree bén rliladx Jesucrist bén za' ree con laa reeman.

¹⁶ Gol bagajpdioz lasa'di zi'c rayal. Dux compniar ree bén raliduladx ree Jesucrist bén za' ree guie, rugajpdioz reeman lëjt.

¹⁷ Compniar raliduladx ree Jesucrist, rniaaban lojdi din gapidi cudad con ree bén rlia' lasa' ree bejn, bén rusquiee ree bejn guial rulüü reeman ni ren ree guial loj ni ma basiididi. Ad guidxga'di laa reeman, ¹⁸ din ad lojt Jesucrist cayüjn reeman sirv, rüjn reeman ni rëntzi reeman, abi' con diidxnagüüdx ne con diidxza'c rüjn reeman gan bén ad ragbeetczi ree o bén ad ragbeeza'ct ree xtiidx

Dios. ¹⁹ Per lëjt, guidibczi ma ragbee ree bejn guial ruzoobquidi diidx zinalidi xtiidx Dios, dád nix yu' luxdon abi' rënan susindi par güündi ni zagdxe ad par güüntidi ni mal. ²⁰ Dios, bën rabe'cdxe luxdoo bejn, laaman gagnë lëjt nayob chitëë güünri xindxab lëjt gan. Dux Dad ree Jesucrist gagnë lëjt.

²¹ Rugajpdioz Timoteo lëjt, bën cayüjn naj yudar con xchiin Dios ni cayünan, në ree bën ladxan bën la ree Lucio, Jason, në Sosípater, rugajpdioz reeman lëjt.

²² Në Tercio, bën cayüjn gui'ch guie rugajpdioz lëjt por dux Dad ree Jesucrist.

²³ Nëtëë Gayo rugajpdioz lëjt, lidxaman za'n, runee tëë lidxaman rado'p ree dux compniar ree bën rliladx ree Jesucrist. Në Erasto, bën naj tesorer luguiedx guie në bën la Cuarto ben rliladx Jesucrist, rugajpdioz reeman lëjt.

²⁴ Dux Dad ree Jesucrist güünle' gradi. Amén.

Diidx bigra bacaa Pab loj gui'ch guie

²⁵ Radëen quixtëë loj Dios din laaman zile' gagnë lëjt din gusnuu gagbeedi sudxi'ch tëëdi loj xtiidxza'c Jesucrist, zi'c ma balüün lëjt xhienaag din gaquidi perdon. Din zian naj xixgab Dios diidx chi gad guidxliuj gacchaaw, xgab ni ad gogbeet ree bejn diidx guía'xchej. ²⁶ Per yan ma rayagbee ree xhienaag naj xixgab Dios, ma rayagbee ree por ree gui'ch ni bacaa ree bën badëë xtiidx Dios loj ree bejn zi'c gunabee Dios laa reeman, bën naban goctëëz. Abi' guidibczi care'ch xtiidx Dios din chililadx ree bejn Jesucrist guzoob tëë reeman xtiidxaman.

²⁷ ¡Tijbzi Dios, bén rajc gradooczi, rayal yaya'p reeman respejt zianczi por Dad Jesucrist! Amén.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb4ebcb8-e1f4-5bfc-b08c-f590e137d86d